



加里山下個約定

「帆牯，慁來去蹶加里山好無？」暗晡頭七點邊仔，阿鑫叔路過小南埔老屋，湊厥姪仔共下去蹶加里山。「張大哥下晝打電話來講，佢同厥妹仔、俵仔，還有德欽哥共下，先上山去囉！喊佢去同佢會合。」阿鑫叔簡單解釋來由。阿帆牯同長袖運動衫著好、球鞋繫好，就跔等阿鑫叔坐等吉普車(jid bu` ca`)上山。

路項，天頂高个雨，緊落緊大點，緊落緊大雨，阿帆牯心肝頭个愁慮，乜緊來緊大點。到咁南庄街路，阿鑫叔車仔一停好，就緊拚拚仔行入一間雜貨店，買咁水衣、手電筒還有高粱、燥料就遽遽攞上車。駛到南庄大橋，左幹係東河、鹿場个方向。一路發風落雨無停，吉普車个引擎(en` jin`)聲緊摧緊響，方向盤(han` do lu`)个運轉緊來緊遽，對石門到鹿場登山口个山路緊來緊難行。阿鑫叔透風落雨，帶等自家个姪仔，就為著愛同張大哥佢兜會合。

這對自從毋識蹶過加里山个阿帆牯來講，當然會愁、當然會驚哪！聽阿鑫叔在車頂講著，頭前該條生疏个山路，對登山口行路出發，愛先經過暗摸厝疏个杉仔樹林，通過風美溪个竹橋，蹶上好漢崎，差毋多愛歸點鐘个時間，正會行到半山排个將軍山屋！這歸點鐘个時間，愛在暗摸叮咚个暗晡頭，在發風落雨个時節來行，阿帆牯想著這，毋單止人會驚，連鬼就會驚喔！

吉普車停在鹿場登山口，阿鑫兩子叔水衣著好，手電筒个電池鬥好，阿鑫叔就同高粱、燥料攞下車，上山去。大風大雨，吹毋忒乜淋毋滅阿鑫叔蹶上將軍山屋个決心；阿帆牯个愁同驚也無法度阻擋，阿鑫叔蹶上將軍山屋个堅心，阿鑫叔一心愛赴著，同張大哥將軍山屋見面个約定。阿帆牯只有刻耐仔跔一路上去。

風合雨个暗晡，風合雨个山路項，阿帆牯一路跔等行路像鳥仔飛樣个阿鑫叔个屎背尾，穿過杉仔樹林，蹶過急水个風美溪，蹶上難蹶个好漢崎，上到臺車路，來到將軍山屋，張大哥在屋肚歡迎好朋友阿鑫叔个到來，兩兄弟黏時打起生趣个嘴鼓。阿帆牯歸身衫褲溼溼，分毋清楚係出大汗抑係雨水涿个！

作者：邱一帆

☆詞彙學習☆

- | | |
|-------------------------------|--------------------------|
| 【湊】ceu：邀請。 | 【刻耐仔】kad` ngai e`：勉為其難。 |
| 【燥料】zau` liau：乾糧、下酒菜。 | 【風合雨】fung` gag` i`：風雨交加。 |
| 【發風落雨】bod` fung` log i`：刮風下雨。 | 【屎背尾】sii boi mi`：背後。 |
| 【透風落雨】teu fung` log i`：風雨無阻。 | 【蹶過】kiam go：跨過。 |
| 【暗摸叮咚】am mo` din` dung`：漆黑一片。 | 【歸身】gui` siin`：全身。 |

☆文法學習☆

- 【自從毋識】cii qiong` m` siid`：從來不曾。「自從」為「從來」之義，其後一般都接否定的「毋識、盲識、無V_{動詞}過」，表示未曾經歷、做過某事。例如：「自從毋識來、自從盲識來、自從無來過」，表示「從沒來過」。